

**KUMPUAN**  
RAM LEH HNAM  
HUMHALH

**YMA**

**AW**



CHANMARI WEST BRANCH YMA CHANCHINBU KAR TIN CHHUAK. VOL. XXIII. ISSUE NO.42 14th Oct., 2012

## Kan Branch YMA in mamawhtute tan thisen pe

**Chanmari West, 14th Oct:** Nimin Inrinni khan kan Branch YMA chuan Aizawl Civil Hospitalah a mamawhtute tan thisen kan pe. Kumin kum tir khan Synod Hospital tan hian thisen Unit za chuang kan lo pe tawh bawk a ni. Kan veng leh kan Branch YMA hi thisen pek kawnga kan tihtat avang hian mamawh hunah thisen dawn kan awlsam phah ve thung thin a, hetianga mi tan inphal leh inpe kan awm thin hi Branch Committee pawh a lawm hle a ni. Midangte tana kan inpekna avang hian kan Branch YMA chuan chawimawina vawi duai lo a dawn phah tawh bawk a ni.

## Lei tawl leh lung rem chim vangin kan vangin harsatna kan tawk leh

Ni 11st October, 2012 a ruah sur nasa tak avanga lei tawl leh lung rem chim chuan Chhungkaw eng emaw zat tan harsatna a thlen. Chawngbawla Section huamchhunga Pu K. darhmingthanga kawmchhak Pu P. Lalchhunga lung rem chu a chim a, a hnuia awm Pu Dara in chu a delh chhe nual a ni. Pu Dara te in hi chen nana hman theih a nih tawh loh avangin an inhnuai luah Pu MK-a te chhungkua nen an inthiar chhuak a ni. Helai hmun thian fai hian Zirtawp zing khan Chanmari lam nen hnatlan a ni a, Nimin

zing khan thawh chhunzawm leh a ni. Hetih lai hian Khuangchera Section-a Pu R. Malsawma kawmchhak pawh Ni 12.10.2012 tlai Dar 4 vel khan a tawl a, an inhnuai chu lauh theih lohin a awm bawk. Helai vel hi a metre 30 huam vel chu a khi nasa hle a, Pi Aithangi in luate pawh an inthiar chhuak bawk. Helai chhiat tawhna hmun Pu Rothuama Branch YMA Adviser silpoulin pek hmangin khuh nghal a ni. Pi Zamanthangi Councillor chuan chhiat tawkte thingpui lum nan hian Rs 500 ve ve a pe a ni.



Tlangval tlawnngaiten ruahsur hnuiah thlan an lai. Thlalatu : Tv Hmingthana

## Branch News

Kan Branch atanga pemchhuak tur ten Section a pem lekhka lak dawnah, mahni chhungkua hming leh pian kum dik tak Section ah hriattir tur a ni.

Kan Branch Asst.Secretary Tv Zairemmawia chu SAY khawmpui hmangin Tuidamah a kal.

Kan Branch President Pu T.Ngurkhuma te, Exe Member Pu K. Lalthakima te, Exe Member Pu Thanseia te chu Aizawl Bethel Presbytery khawmpui Ramhlun North a neihah an palai.

Tunlai ruahsur avanga kan vengchhunga chhiat tawk an awm chu pawi kan ti hle. Ni 12.10.2012 zing kar khan CH Section-te an hnatlang a, Nimin zing khan Branch pum huapa hnatlan leh a ni bawk.

Tunlai hian kan vengchhungin chhiatna leimin, thihna kan tawk zing deuh a, hruaitute leh memberen mite tanpuina kawngah tan la thar zel turin kan innge e.

Nimin khan Civil Hospital-ah kan Branch chuan thisen kan pe a, thisen petu zawng zawng chungah lawmthu kan sawi.

## LUSUN KHAWHAR

Heng mite hian min boral san a pawi kan ti hle a, an kalsan an chhungte kan tawrhpu tak zet a ni.

1. Lalremkimi kum 5 D/o Vanlalhruaii 'V' Section chu Ni 7.10.2012 khan a boral.

2. Pi Lalzami kum 83 M/o Tv Zohmingliana 'V' Section chu Ni 9.10.2012 khan a boral.

3. Pi Biakmawii kum 77 W/o Thlamkunga (L) 'V' Section chu Ni 11.10.2012 khan a boral



## TUNKAR CHANGVAWN

Chatuana nunna in nei tih inhriat theih nan nangni Pathian Fapa hming ringtute hnenah heng thu hi ka ziak a ni..

I Johana 5: 13

**Editorial Board**

<b>Editor:</b>	J.Lalnangliana	9862399658
<b>Joint Editor :</b>	Lalchhandama	9862358347
<b>News Editor :</b>	Thangkhuma	9862303135
	R. Lalrinngetha	9862358337
	Jacob Lalrinsanga	9612319779
<b>Cir.Manager :</b>	Johny Lalthanpuia	9612359161
	EVL. Hruaitluanga	9862655426
<b>Production Manager :</b>	R.Lalhmachhuana	9436151817

**Branch Office Bearer**

<b>President</b>	T. Ngurkhuma	9436190843
<b>Vice President</b>	R. Lalhmachhuana	9436151817
<b>Secretary</b>	RL. Thanhnuna	9436152760
<b>Asst. Secretary</b>	Zairemmawia	9862385654
<b>Treasurer</b>	C. Lalzarliana	9436142049
<b>Fin.Secretary</b>	K. Darthantluanga	9436196071
<b>Adviser-te :</b>	Pu Lalbiakthanga Khiangte	
	Pu Rothuama, Pi Zamanthangi	
	Pu Lalrengpuia Sailo	

Article :

**Editorial :**

Kan vengin kawng hrang hrangin chhiat kan tawk a, heng hunah hian nula tlangvalten a thara tlawnmgaih chhuah a ngai a ni. Chutih rualin hruaitute pawhin tan lak thar a ngai khawp mai. Chhiatna a lo thlen chang hian kan hruaitute thu ngaihchan a, an zai anga kal a tha khawp mai. Tlawnmgai kal khawm kan ni bawk a, eitur chungchangah pawh tlawnmgaih zia kan lantir a tha hle.

YMA hruaitute hian chhiatna thlen chang hian mawh kan phur nasa viau a, chutih rual chuan khawtlang nu leh pa pawh hian YMA te mawh lak dan leh tihtur chin hi kan thliar thi am a tha hle. Chutiangin YMA hruaitute pawh hian kan mawh-phurhna tur kan lak thiam a ngai a, makpa hna leh thenawmte tihtur awm ve reng hi a awm a ni, chung zawng zawng chu kan thliar hran a tha a, YMA hruaitute kutah heng chhiat thil zawng zawng dah tum hi thil tha tak a ni lo mai thei, mihring ve bawk an nih avangin leh hna tul tak tak nei an nih avangin an mawhphurhna tawk pek thiam a, anni pawhin an chanvo tur tawk an thliar thiam angai bawk a ni.

**SAWHCHIAR CORRUPTION***Mangheta Ralte*

Kan thupui hi "Nilai leh Beirual Thupui" ang ema ram leh hnam hnuh khawih phak leh Thlarau nun chawm phak turah kan ngai chiah lo a nih pawhin; kan Pathian mit hmuah chuan mi rethei chan ai sum leh pai ei ruk hmanga in leh lo ropui tak dintute leh sawhchiar ei ruk vanga thiante riltama siamtute dinhmun hi "Van Lal nau anga a tahna Kalvari-ah chuan an dang chuang dawn emaw ni le"?

Sawhchiar generation-ah hian eng chen nge kan la awm dawn tih hre chiah lo mah ila, tun dinhmunah hian YMA member-te hian sawhchiar ei leh sem chungchangah hian zir tur kan ngah khawp mai. He sawhchiar sem hi 'Zanriah hnuhnung' ang zeta urhsun tur leh 'Mo lawmna ruai' tluk zeta puar leh fanna tham a ni miah lo. Mi tlawnmgai, meng rei leh zai hahte pum ruak lutuk, tlem tala a lo chhawk theihnana tamhnem atan chauh a ni tih i hre thar leh ang u.

Kan hruaitute'n beng sika an ngaihthauh hnuin a daih ngei tur nia an hriat an han sawhchiar ta thin a. Hruaitute beisei aia thahnem sawhchiar sem hun thlenga kan lo la meng a nih chuan a lawmawm lamah ngai ila. Chuti ni lova, tute emaw duham leh koham vanga tlawnmgaih sawhchiar semtu nulate leh a siamtute tlangval tlawnmgaih a daih lo thin erawh hi chuan rilru a ti na deuh thin.

Kan mi hrang kal hmasa, Vanapa te'n ram palailenga theipui hmin pawh mahnia ei hmasa duh lova, thiante an koh khawm laia, mi dang siamsa kan lo ei ru thin hi chu a zia lo lam hret lo maw? 'Sem sem dam dam, ei bil thi thi' nunze mawi tak leh tunlaia kan thalai thenkhatte nundan hi chu a va han impersan ta em! Sawhchiar thleng hnih eia puar tako i pum i zut i zut lai khan a siamtute leh a semtu nulate chuan a tlem tawh avanga ei bik nih duh lovin tlawnmgaih takin an inhnawn kual ve thin asin. Hetianga nula leh tlangval tlawnmgaih che vel han hmuh erawh hi chuan rilru a va tihtim thung si em! Mi dangte ei zat leh chan zata kan lungawi ve lo leh puar tako tlaivar kan tum a nih chuan mahni tawka ei tur ken mai kha a la mawi zawk lo maw? Tu ma'n an sawisel ka ring chiah lo.

Mahni chan tawka lungawi lova, mi dangte chan tur lo chheprelh thinte hi kan nula tlawnmgaih, sawhchiar semtu hian an hre thei viau leh nghal; an hmu nikhua vak

A chunga kan tarlan tak sawhchiar thleng khat lo eirutute aimaha demawm leh mawi lo zawk an la awm cheu. Chung mite chu tute nge ni a? Khawi lam atanga lo kal nge an nih? tiin ka'n inzawt chhin a. Tlangval thenkhat, sawhchiar sem hun hmaa Lumenna hmuna lang miah lova, khawilai emaw a zu leh ruihhlo dangte nena lo interek a, sawhchiar sem dawn chiaha Mitthi in rawn pan thinte hi an lo ni a. Heng mite hi an zahpuiawm leh zual, an tlaivar ngai lo tlangpui lehngthal. Heng mite chetdan en chuan thleng hnih nena tlaivar tumte chu Chawimawi tlak hial an ni zawk awm e. Engpawh chu nise, a eiru duh chuan lo eiru zel rawh se, tlawnmgaih ei tur chang lo ngam zawkte hian ngaihsan an hlawh zel tho ang.

**2012 Thuvawn**

*I awmdan tur chu  
LALPA chungah nghan  
la; Amah chu ring la,  
aman a ti vek ang.*

## TAITESENA

» An hruaitu Pu C. Lalfela'n fanu duhawm tak a nei a, an lawmpui hle.  
 » Tunkar hun remchangah Section Committee meeting tum a ni.  
 » Vengchhunga khawhar chhungte leh lei min tuarte an tawrhpu hle.  
 » An Section chhunga damlote an dam leh thuan an duhsak hle.

## VANAPA

» An hruaitu Pu Lallianzauva, Durtlang damdawi In awm leh Pi Thai w/o Pu Mawizuala, Greenwood hospital-a awm mek chu dam taka an lo chhuah leh thuai an duhsak.  
 » An member Tv Eric Zomuanpuia s/o R. Lalbiakdiki chu AFC hminga 10th Administrator's Challenge Cup (U-17), khel turin Chandigarh lamah a kal mek a, duhsakna an hlan.  
 » Kar leh hun remchang hmasa berah NI Melody Lalriatkimate inah section committee koh tum a ni.  
 » Ni 15.10.2012 (Thawhtan) zing karah member nawlpui huapin Khawhar ina bungruate seng fel hnatlang neih tur a ni. Zing dar 6:30- ah Pu H. Lalrawna kawtah innghakhawm tur a ni a, member-te thawk chhuak vek turin an inhriattir.  
 » VANAPA Day (Section sport hmang turin inbuatsaihna kalpui mek a ni a. Sport-naa tel tum YMA Member te chuan a hnuia hming tarlanah hian inpek ngei tur a nitih an inhriattir:  
 Tv Hmingthansanga - 9436195702  
 Tv R. Lalrinnghta - 9862358337  
 Tv Lalnunhlima (Valpuia) - 9862344262  
 Tv David Vanlalpeka - 9774781160

## NEUVA

» Kar leh hun remchang ah Section Committee meeting koh tum a ni.  
 » Chhungtin ten Bawlhhlawh paihna Motor hmang tangkai a, Motor ah chauh Bawlhhlawh pahi thin turin an in gen.  
 » YMA Bungrua te hi kan ta vek a ni tih hriain dimtaka hmang thin turin an innge a, Thatnia bungraw hawh tur ten Property Incharge te hnenah ziak a dilin Zing dar 8:00 hma leh tlailam dar 3:00 hnu lamah hawh thin tur a ni.

## CHAWNGBAWLA

» An Section chhunga leimin avanga in chhia Pu K. Darhmingthangate chu an tawrhpu hle.  
 » October thla tawpah kan project Essay ziah leh football khelh tum a ni a, memberte lo inrin lawk tur a ni.  
 » Zirtawp zing leh Inrinni zing kar khan Section chhunga lung rem chim chu thianin an hnatiang, hnatiang thawk chhuak zawng zawng chungah lawmthu an sawi.  
 » An leader Pu Kima chu khawmpuiah a palai a, Pu Thara Comt. member pawh a dam leh tan ta.

**Cheng vbc 2900 hnek chhuak thei Holyfield mangang**

T-a

Dam chhunga cheng vaibelchhe khat thawk chhuak lo tur eng zata tam awm ang i maw ? vaibelchhia chu sawi loh maktaduai pawh tam tak a ni. Vawn ga world boxing heavyweight champion ni tawh Evander Holyfield erawh chuan cheng vaibelchhe 2900 chuang a hnek chhuak a, mahse, tunah chuan leiba cheng vbc 80 chuang neiin rulhna tur a nei si lo va, harsatna a tawk.

1997 khan Holyfield hian Las Vegas-ah boxing khawvela dai tawh lo tur inhnek lian leh ropui a hmachhawn a, a hma kum lawka round 11-naa a knockout tawh Mike Tyson nen an inbei. Holyfield leh Tyson-te inhnek vawi hnihna atang hian dollar maktaduai 100 hmu a ni a, 2007 thlengin boxing chanchina inhnek tum khatah sum ruh tamna ber niin, Holyfield hian dollar maktaduai 35 (cheng vaibelchhe 180 vel) a hlawh a, Tyson-an dollar mtd 30 (cheng vbc 150 chuang) a la lut ve thung a, Tyson hian Holyfield-a beng a sehtlhaksak a nih kha !!

Holyfield-a vanglai a ni a, Tyson nen an inbei vawi hnihnaah hian pay-per-view unit mtd 1.99 hralth chhuah niin, hetiang zata tam hi vawi khat inhnekah hralth a la ni ngai lo va, boxing chanchin a sawi danglam hle. Mahse, 2007 khan welterweight huangah Oscar De La Hoya leh Floyd Mayweather Jr chuan khumin pay-per-view mtd 2.7 vel an hralth a, De La Hoya phei hi chuan dollar mtd 50 chuang hlawhin vawi khat inbeiha sum rut tam ber a ni.

A vanglaiin Holyfield hian mipui a hip em em a, Tyson bakah Lennox Lewis leh Riddick Bowe-te nena an inhnek phei chu heavyweight chanchina inhnek ropui ber ber a ni hlawm. Sum tam tak a hnek chhuak a, nuamsa taka dam chhung hun hmang thei tur khawpin a rut mawlh mawlh mai a ni.

Professional a luhchilh atangin kum 28 hun a hmang tawh a, tun thlengin hruihruala luu a la inpeih reng a, fighter zinga mipui hip bera an chhal Tyson aiin

sum a hnek chhuak tam. Tyson hian Holyfield angin inhnek a hmachhawn tam lo va, hruihrualah hun a hmang rei lo bawk a, mahse, cheng vbc 1500 chuang fe erawh a hnek chhuak. Mahse, 2003 khan a tlachhia tih khawvel hriatah puanzar a ni.

Holyfield hian tunkar hian kum 50 a tling dawn a, tum dang angin a piancham hlim takin a lawm thei dawn lo. Leibain a delh rih lutuk tawh avangin Atlanta khawpui daifema a chenna in ropui tak mai, pindan (room) ringawt pawh 109, inbualna hmun nuam leh zau tak (bathroom mansion) 17 chhawm tel tihrala a leiba tihzaawm a tum a, lo theih loh avangin he in ropui tak hi cheng vbc 40 velin a zuar a, November 30 khian Los Angeles-ah a thil hlu dangte nen lilam a ni dawn.

Mihring tana thil harsa tak, a nun dan phung a tihniam a ngai dawn. WBC, WBA leh IBF champion hui hian thil hlu a neih tam tak pawh a deh ral a ngai a, rangkachak leh lunghlu sana man to tak tak leh lirthei man to a neite a hum zui thei hmel lo va, heng zingah hian a car roh em em, a pian kum 1962- a siam 1962 red Chevrolet Corvette pawh a hralth a tul ngei dawn niin an sawi.

Holyfield hian hmeichhe hrang pangaah fa 11 a nei a, heng a fate chawmna tur hi a tumsak vek a ngai. Dollar maktaduai 10 tel a hnek chhuah thin laiin mi hang dangte ang thovin sum dah that aiin inchhek arbawm lamah a tlan nasa a, nungchang chhia leh ruihlo avanga buai a ni lo na a, inrelbawlna lamah erawh pa fing tak a ni bik lo va, a elpui thin Tyson ang em chuan tlachhiai mualpho lo mah se a dinhmun a ropui lua bik tawh lo.

Fa a ngah a, pakhat enkawl nan thla khatah dollar 3,000 (cheng nuai 1.5 chuang) a sen ziah a ngai a, a talbuaina chhan ber a ni tih Holyfield chuan sawiin : "Tunah hi chuan a hautak tak zet a, ka fa neih tawhte chawmna tur pek chhuah hi a harsa em em a ni," a ti.

## Lawnthu sawina

Kan kawmchhak lung rem chim avanga kan In chhia vel senghawi ngai leh tanpui kan ngaihna zawng zawnga min tanpuitu Chanmari West leh Chanmari veng mipuite, YMA leh Local Council hotute chungah leh Silpoulin tha tak mai min petu Pu Rothuama chungah lawnthu kan sawi tak meuh meuh a ni.

In khawngaihna dawngtu  
K. Darhmingthangate chhungku

### MUP

Ni 1 October kha Uperate Ni a ni a, Chanmari West MUP pawhin Indoor Stadium-ah hlim takin hun an hmang a, a hnuia mite chungah hian lawnthu an sawi a ni.

1. Pu Lal Thanzara - Rs 3000.
2. Pi Zamanthangi - Rs 1000.
3. MHIP - Rs 1000.
4. Dr. Hmingthanuala - Rs 1000.
5. Pu F. Zosanga - Rs 500.
6. Pi Lalringliani Retailer- Chini Kg 3.
7. Indoor Stadium Managing Board-in Indoor an hman tir avangin.

### Badminton Club

➤ Kanan Open Tournament khel turin an inbuatsaih mek.  
➤ Naupang tan Coaching kalpui mek a ni a, a tel duh tan hruiitute bulah ngaihven tur a ni e.

### KEIMAHNI

➤ Tunkarah hian Tv. Manghetate inah YMA AW chhut tum a ni a, thuchhuah tur nei chuan hetah hian pek mai tur a ni e.

➤ Thingpui tui tak min lum saktu Sangtei chungah kan va lawm em.

➤ Min tawiawmtu Mapuia, Mala leh Hmingthana chungah kan lawm.

### PEM CHHUAK

1. Pu Saplaithuama te chhungku chu Pi Samthangi 'N' Section te In atangin Edenthalah an pem
2. Pu Perry Mihlo te chhungku chu Pu Laldinthara 'CH' Section te In atangin Tuikhuatlangah an pem.

### YMA CONFERENCE CHUNGCHANG

Ni 23-25 October, 2012  
chhung khian YMA General Conference chu Kawrtethawveng khua-ah hman tur a ni. Conference kal tumte (Hruaitu leh member) tan vawiin hi inpek hun tawp a ni a, kal tum chuan Pu R.L.Thahnuna, Branch Secretary hneneh in report vek tur a ni.

## ZOFA NEWS

➤ Doordarshan Kendra (Gwuahati) a Hnam Lam recording nei turin an inbuatsaih mek a, harsatna dang a awm 1oh chuan Ni 27.10.2012 (Inrinni) hian member 25 velin Aizawl an chhuahsan ang.

➤ Ni 6-7 Oct 2012 khan Rallu Lam Documentary Film shooting hmasa ber chu PKT Farm, Selingah an nei. Remchan dan ang zelin shooting hi an neih chhunzawm ang.

### Thlanmual Sub-Committee

➤ Thlan siamten thlanmual bungrua te fai tak leh tha taka kalsan hram nise.  
➤ Chhiattawk an awmin thlan lai an tlem thin hle a. Tlangvalten thlanlaih hi mahni tihtur a ni tih hriaa thlanmual lam pan turin an inchah.

| KIDS' DEN PRESCHOOL, DAY CARE AND AFTER SCHOOL CARE | D. Englani Building, Chaltlang Venglai

| LOWER PRE SCHOOL : Kum 2 atang a kum 3 la tling lo inkar (10:00AM - 12:30PM)

| PRE SCHOOL : Kum 3 chin chunglam (10:00AM - 12:30PM)

| DAY CARE : Lower Pre School leh Pre School nileng in kan awm thei (10:00AM - 4:00PM)

| AFTER SCHOOL : School danga kal Class I - III School a lam saka Home Work lo tihpui leh a tuldang te te kan ti bawk e

| ADMISSION: 1<sup>st</sup>. Nov. 2012 atangin Pick and Drop kan ti thei bawk.

| Sd/-  
Principal

| Ruth Vanlalthakimi Hmar,  
B Sc. Nursing, Diploma in Child Development  
| 8794026603

### Camping... Camping

A hun : 15-20, October, 2012

A hmun : Ramtea Camping Centre, Zuangtui

Speaker : Lawrence Rothangpuia

Ken turte : Mut bu, Baibul, Buhfai

No 8

Kal turte chu October Ni 15 (Thawhtan) chawhnu Dar 2-ah Vanapa Hall atanga chhuah tur.

Contact : Patea (8974121157)

Barry (9612845911)

Edeni (9862358876)

## S M S

**SMS thawnna tur : 9862358337.**

➤ Kumin chu kan veng tan chuan Chhiatpui Kum a ni ringawt alawm le. Chutih rual chuan khawtlang hruiitute leh YMA hruiitute inpekzia a lo lang chhuak a, a ropui thin khawp mai.

9612319779

➤ Central Road leh Sairang Road vela zanrei tak tak hnuia zai thinte hi an va bengchheng thei ve. Mi mitmei venna chang hriat loh hi changkan lohna pakhat a ni e. Sim hmak atan a tha khawp mai.

9772380461

➤ Chhiat tawk kan han awm zin deuh hi chuan YMA member-te hian tan lak thar nachang i hre zel teh ang u

8972370971

**SMS kan dawnte hi Editorial Board ngaihdan a ni vek kher lo.**

### PAWISA CHHAR

Pawisa chhar a ni a, a ti bo chuan Pu Vanlaltlana 'CH'-Sec, (Kawng kawipuiah) ngaihven theih a ni.

### CHHUNGtin MAMAWH

Puanthui khawl, Puan pan, Puan fan, Puan chhah thui thei turin kan siam thei e. Gas stove tha lo, herh sak, leak etc kan siam thei bawk e. Khawl (Kut khawl) chhuak hmasa chi a pan, a fan, a chhah thui thei tlawm te te a lei tur kan nei bawk, rawn thlang ve rawh, A mamawh tan koh theih kan ni e.

Contact : LH CHAWNGTHU  
(1-3) 9612322639

### OCTOBER SPECIAL!

| SAITIKA, KAWNG NA, THA NA, INGHAWNG NA, DAR NA, KHUP NA, TI HRAWL NA, PANGKHING ZENG, HMAI SAWI, NERVE THA LO leh al kaihhnawih natna chi hrang hrang, khawl tha tak tak hmangin kan enkawl thei e. Hetiang harsatna i nei a nih chuan min rawn pan la, Physiotherapist thiam tak, National Institute atanga degree zir chhuakin a lo enkawl ang che. 31<sup>st</sup> October 2012 thleng a MAN CHANVE (50% DISCOUNT) in kan enkawl thei e.

Timing : zing: 6:30 am - 9:00 am.

Tlai : 2:00 pm - 5:30 pm.

(Monday - Saturday)

AIZAWL PHYSIOTHERAPY CLINIC  
Pu Rinsanga IAS (Rtd.) Building  
Chanmari Kawm, Glenary's bul  
Ph : 0389-2347456 / 9856907725

(3-3)